

ABSTRAK

Pembangunan Kampung Baru Kuala Lumpur adalah penanda aras yang penting kepada situasi orang Melayu di Kuala Lumpur masakini secara keseluruhannya. Ini (pembangunan Kampung Baru) memberi kesan secara langsung terhadap unsur-unsur seperti emosi, sentimental, jatidiri serta politik orang Melayu di Kuala Lumpur. Dalam ertikata lain, Kampung Baru dan orang Melayu di Kuala Lumpur adalah dua faktor yang sinonim, yang sering berkait rapat antara satu sama lain serta saling lengkap-melengkapi. Kawasan penempatan Melayu ini telah merakamkan banyak nostalgia, sejarah serta peristiwa yang banyak mempengaruhi kesinambungan serta perjuangan orang Melayu di kawasan bandar besar seperti Kuala Lumpur.

Pada masa yang sama pula, Kampung Baru serta penghuninya sedang berhadapan dengan cabaran-cabaran yang didatangkan di dalam bentuk-bentuk yang baru. Antaranya ialah cabaran globalisasi, ekonomi serta pembangunan Kuala Lumpur yang tanpa disedari menghimpit Kampung Baru seiring dengan perjalanan waktu. Jika dinilai dari keadaan semasa Kampung Baru dewasa ini, pembangunan yang dinikmati oleh penghuninya adalah di tahap yang minimal. Walaupun dilengkapi dengan kemudahan asas seperti air, elektrik, jalanraya serta perparitan, kemudahan-kemudahan ini lebih merupakan prasyarat yang biasa seperti kawasan penempatan yang lain di Kuala Lumpur.

Di dalam konteks ini, peranan yang dimainkan oleh Dewan Bandaraya Kuala Lumpur merupakan satu bahagian yang terpenting di dalam memajukan kawasan Kampung Baru. Pembangunan Kampung Baru memerlukan satu bentuk yang baru yang disertai dengan pendekatan-pendekatan yang lebih segar serta bersifat realistik. Pendekatan-pendekatan baru

ini perlu diterapkan di dalam pelaksanaan pembangunan Kampung Baru memandangkan segala strategi serta usaha pembangunan yang terdahulu telah menemui jalan buntu di dalam membangunkan kawasan ini.

Pengenalan Draf Pelan Struktur Kuala Lumpur 2020 oleh Dewan Bandaraya Kuala Lumpur membuka satu lembaran baru di dalam segala usaha pembangunan yang dikhususkan oleh Kuala Lumpur pada masa hadapan. Pembangunan yang bakal dilaksanakan kini dirangka dengan lebih komprehensif serta agresif di dalam mengubah status Kuala Lumpur selaku sebuah bandaraya yang lebih dinamik serta bertaraf dunia di masa yang akan datang. Pembangunan Kampung Baru turut tidak terkecuali menjadi sebahagian daripada agenda draf pelan struktur ini selain daripada meneruskan agenda pelan struktur yang terdahulu di dalam pembangunan kawasan ini.

Apa yang pasti ialah, Draf Pelan Struktur Kuala Lumpur 2020 ini akan menjadi satu kayu ukur ke atas kemampuan pihak Dewan Bandaraya Kuala Lumpur untuk membawa pembangunan yang diharap-harapkan selama ini oleh penduduk Kampung Baru. Dalam pada masa yang sama, bebanan yang ditanggung oleh pihak DBKL adalah berat dan tugas untuk memajukan Kampung Baru bukanlah satu perkara yang mudah jika merujuk terhadap kegagalan yang wujud di dalam pelan struktur yang terdahulu. Justeru, pembangunan Kampung Baru perlulah dipandang serius kerana ianya amat penting di dalam menentukan nasib penduduknya pada masa hadapan, di samping mengelakkannya menjadi simbol keaiban orang Melayu sekali lagi dalam tahun 2020.